

U Sarajevu počeo 2. kongres bh. naučnika iz zemlje i svijeta

Za nauku će do 2010. biti izdvojeno do 200 miliona KM

Na Kongresu učestvuje više od 400 naučnika iz BiH i 120 iz 23 zemlje svijeta

Poseban prioritet ove zemlje mora biti obrazovanje, jer smo tokom agresije izgubili korak sa svijetom, i to u vremenu kada se dešavala informatička revolucija, kazao je jučer predsjedava-

jući Predsjedništva BiH Haris Silajdžić na otvaranju Drugog kongresa bh. naučnika iz zemlje i svijeta, koji se održava u sarajevskom hotelu "Radon Plaza".

Na Kongresu učestvuje više

od 400 naučnika iz BiH i 120 iz 23 zemlje svijeta, a cilj je predstavljanje naučnih radova i povezivanje bh. naučnika s naučnicima širom svijeta.

Predsjednik Organizacionog odbora Kongresa Denis Zvizdić na pres-konferenciji kazao je da su dobili čvrsta obećanja da će do 2010. godine na svim nivoima vlasti biti izdvojeno minimalno jedan posto bruto nacionalnog proizvoda BiH.

To znači da bi u naredne dvije godine trebalo biti obezbijeđeno 150 do 200 miliona KM za razvoj nauke kako bismo kreirali bh. društvo utemeljeno na znanju - kazao je Zvizdić.

Rektor Univerziteta u Sarajevu Faruk Čaklovića naglasio je da su prvog dana održali i nekoliko radnih sastanaka, jer je cilj ovog kongresa, između ostalog, i potpisivanje bilateralnih sporazuma s predstavnicima visokoškolskih ustanova iz Evrope i svijeta te kandidiranje projekata na kojima će zajedno raditi domaći i strani naučnici. **M. A.**



S Kongresa: Planirano i potpisivanje bilateralnih sporazuma (Foto: F. Fočo)